

明史稿
衡云山人集

明史稿
衛云山人集

釋史撫遺卷十目錄

吳郡李瑤子玉纂

武臣列傳

李定國

勅統武

鄭成功

子經孫克塽

案前史原例中以孫可望降附

本朝例不得載詳於李定國傳以李成棟事屬
無始但於其子元胤傳中見諸以鄭氏父子祖
孫仿吳越世家例專合一傳之此三者溫氏勵

存其說攷諸舊文盡湮失矣夫定國起家艸澤
坎坷從王其能拔志盡瘁沒身不渝彼孫賊豈
得與之並議哉李茂棟有終無始鄭芝龍有始
無終其揆一也唐王之於鄭氏初則倚若長城
芝龍開府安乎私權洋稅富與國侔乃竟棄主
如遺棄家不顧成功不得已以子叛父入海後
則自成一家已雖陽奉粵朔而設官興寇久稽
天討直與永明痛癢無關今各撫其畧以備參
觀以副佚史之志至成棟擾亂粵中覆土毒民

奉王後又塊然負職忌瞿留守則疏請召還援
金聲桓則中道醉歿俱旁見佗傳其子元胤怙
勢攬權勾黨歛賄於五虎事間亦畧書厥狀佗
復無可紀錄也茲姑從簡

釋史撫遺卷十

列傳十

李定國字鴻遠延安人與孫可望艾能奇劉文秀同爲獻忠義子賜張姓與衆徇行諸郡縣賊性喜殺亂蜀時立賞格凡部卒日得男壯手足二百雙者授把總女倍之童穉不計官以次進階寅出酉還以爲常可望輩遂皆至將軍歲丙戌我

大清兵勦獻賊於西充之鳳凰坡定國時僞稱撫南將軍與可望能奇文秀及僞都督白文選馮雙禮等

招集殘寇由重慶南竄明年丁亥春破遵義入貴州
可望赴雲南救沙定洲之亂令定國分兵襲臨安臨
安爲沙部李阿楚駐守拒戰甚力定國乃穴地置砲
砲發城陷阿楚赴火灰城中士民悉被屠復圍晉寧
及昆陽呈貢歸化晉寧知州冷陽春呈貢知縣夏祖
訓等俱歿之江川知縣周柔強率兵拒於撫仙湖戰
敗一軍盡殲迤東諸郡屠戮之慘不亞於蜀也時永
明王立肇慶詔令不及至可望已據有全滇妄自尊
還至黔中自稱平東王故在籍御史任僎禮部主事

方于宜倡議尊爲國主設內閣九卿六部科道官卽
以俱爲吏兵二部尙書于宜爲翰林編修製鹵簿定
朝儀擬僞號爲後明以于支紀年改印篆九疊鑄錢
文曰興朝通寶定國等皆自名爲王寘四王府盡撤
昆陽呈貢二城輒石爲之又毀民居萬餘間作演武
塲收各路工技悉歸行伍隱然謀竊大號然定國能
竒輩猶儕跡之定國尤倔強遇事相亢可望思所以
示威與文秀密爲計於己丑春以演武塲縛定國
聲其梟杖之百已復相抱哭令取沙定洲自贖定國

心憾之念兄事久未可造次發難輒領所部馳至晉
洱討定州圍以木城絕其水道閱五旬諸蠻思降者
相續乃禽定州及其屬數百人出回至省剝其皮號
令通徧黔國公沐天波來具禮謝雪不共讐凡滇人
之撻沙毒者咸稱快焉定國旣并蠻部聲勢益強可
望遂無以爲制獨霸之念于是乎沮會聞粵東有君
乃具表奉朔求封爵孫李之隙自此始永明王初封
定國爲侯尋進公壬辰春王居安龍進封西寧王
大清遣定南王孔有德統師南伐有德分重兵駐柳

州爲聲援已以七百騎趨河池州入黔定國乃與馮
雙禮由黎平出靖馬進忠由鎮遠出沅期于武岡會
圖桂林有德還軍入桂林城守遇於全州戰不利叛
將陳邦傳及其子曾禹獲之送貴州去其皮勳之有
德自經歟是時定國軍威壯盛不復受可望節制可
望忿甚已而有衡州之敗可望遣使遣召將以其敗
也殺之定國覺不赴進攻靖沅武岡不下乃疾走粵
西初追定國雙禮邀擊定國定國禽而釋之故雙禮
得傾心以事明年癸巳春可望自將精騎追定國

大兵抵寶慶猝與之遇雙禮將左文選將右而可望
建龍旂列鼓吹 大兵急攻之大敗走惟雙禮軍不
動 大兵引還乃以武寶之間爲界定國遂據守粵
西時王在安龍日就窮促憂思加殷可望又盡撤舊
立太廟括取近省田畊鹽井之利以官四民六爲令
王迺出與大學士吳貞毓中官張福祿全爲國等謀
遣給事中林青陽賫敕赴定國營進封晉王令統兵
入扈定國奉詔感泣許以身報王復鑄屏翰親臣金
印賜之已而馬吉翔洩其謀於可望甲午春可望遣

使詣王所索同謀者吉翔與內監龍天壽助之自貞
毓而下十八人俱被害可望憾定國益深定國亦恐
其來襲因出掠廉雷破高州進攻新會爲大兵敗
而走乙未退守南寧可望攻常德亦敗歸王起居日
困諸將吏希可望指率無人臣禮丙申春定國敗可
望兵于田州將迎王入滇可望偵知趣令白文選至
安隆叔王赴黔合宮皆慟哭從官亦哭文選雖爲可
望用而心不直其所爲乃密告王曰姑遲之候西府
至西府者定國也定國至乃奉王由安南衛西趨雲

南滇中守將爲劉文秀王尙禮王自奇等文秀亦數
怨可望遂率騎私出迺沐天波亦來迎王入城居可
望第中定國亟令收吉翔將殺之吉翔復媚事之以
免尋與天壽仍用事王封文秀爲蜀王尙禮自奇亦
封公封文選鞏昌王文選還可望怒其二於晉也盡
奪其衆而轍之然以家口在滇未敢反明年丁酉夏
王命張虎歸其妻子秋七月孫賊遂舉兵反詔削其
爵九月定國文秀軍於三岔河與賊夾交水爲陣孫
賊揣曾城必虛別遣部下馬寶張勝由尋甸襲雲南

自將勁卒與定國門兵方合賊衆大呼迎晉王一軍
瓦解其大將白文選馬進忠馬維興等悉叛歸晉軍
而襲雲南之將馬寶亦來降惟張勝抵城下尙禮將
內應天波知之守以兵得不發定國還師禽勝於渾
水塘殺之尙禮仰藥歿於是文秀文選合兵窮追賊
賊狼狽入黔挈妻子奔長沙投我經畧洪承疇軍前
以降馬雙禮截其所掠子女玉帛還論功雙禮進忠
俱爵爲王其餘諸將進秩有差戊戌二月

王師自蜀楚粵三路會兵入黔報至定國分遣其將

劉正國楊武等扼守三陂紅關諸險要馬進忠駐貴
州四月王自奇關有才反定國自將討平之楚師入
鎮遠貴州告急不及救進忠遁貴州遂失蜀師至三
陂正國遁遵義亦失五月蜀師破楊武兵於開州之
倒流水秋七月朔王拜定國爲招討大元帥賜黃鉞
粵師抵獨山州十月三路兵俱集戒期入滇定國與
雙禮等掘雞公背圖復貴州令文選守七星關十二
月蜀師出遵義趨天生橋入烏撒文選思棄關走霑
益會泗城州土司官岑繼祿導師入安隆定國遣懷

仁侯吳子聖禦之敗績乃由盤江還兵拒戰連敗於
安隆之羅炎凉水井大營妻子俱散失諸將北走不
相顧遂拔寨遁回馬寶等降報至王奔永昌己亥正
月三日 大兵入雲南王下詔梟已定國還鉞待梟
請削秩不許二月望日 大兵抵大理之玉龍關文
選戰敗從沙木和走右甸出鎮康入木邦定國令總
兵靳統武以兵四千扈王奔騰越已乃伏兵高黎貢
山中十八日 大兵次永昌越日次潞江謀洩定國
出戰勢不支退至孟良王與馬吉翔李建泰等連夜

走之二十八日抵銅壁關緬人令從者悉去兵器以
入旣而白文選屯兵木邦定國就之謀曰主上入緬
敕漢兵無入關我若深入恐生不測旣萬一北兵有
警此地無險要可禦莫若妥擇邊境屯集作後圖而
文選以王左右無重兵請身入捍衛意不合定國遂
自引所部從孟良抵猛緬駐劄前此潰衆陸續至勢
稍振未幾移營孟連賀九儀邀文選部將張國用趙
得勝等皆投歸旋約沅江土司那嵩爲恢復計孟良
酋長思爲所并糾衆門定國滅之遂據其城時我